

ኤና ዎይንን ሃምንም ይንዛራ ኤልቅንዳዳናሳ ዳይንሞኖ

ማርቆስ 12

1. ሃያንቱ ኖ ይንታ ሃማንቱ ኬናንቱ ዳይንሞኖኻ ጌያን ካርስዲና፡- “ኤዲ ካላ ይሳ ሃምሮጎ ዎይንን ሃቃን ኮርዲና፤ ዴሞን ኮሳም ካርሚ ጫእዲና፤ እሎን ይንግዶር ኮም ጩባዳይንም ኮይዲና፤ እንሣን ይንግዶር ኮም ዳቃንዳይንም ካይዲና፤ ሃያንቱ ኤና ሃምን ዳቃናይናንቱ ኤልቅማንቱ ፔ አብዛራ ያእዲና።
2. አፒን ይንካ ካማዳይኖ ዋዳኖ ኮየስካና፤ ዎይንን አፕን ክናንቱ ባእቱ ናዴኻናንቱ ይሳ ካይስና ግዶርካ ካላም ኤና ሃምን ዳቃናይናዛራ ይእስዲና።
3. ኮዶን ኬ ኤያም የዳንቱ ዳንቱ አን ጉሮ ይእስዲና።
4. ፕርካሞ ካይስና ግዶርካ ካላም ይእስዲና። ኬ ሜቱ ክሳም ፓካንቱ፤ ክንካ አልማንቱ ማስዲና።
5. ፕርካሞ ካይስ አብ ይእስዲና፤ አጋምካሞ ኬ ዴስዲና። እንታ ሃያንቱ ኖ ክይእሳዳና ካይስና ዋኒ ጴፅና ግዶርካ ኬሳ ዋኒም ኬ ዳይዲና ዋኒምካሞ ኬ ዴሲዲና።
6. ፕርካሞ ኖ ኤዲ አብ ክይእሳዳ ዳይዲና፤ አጋኻሞ ክሳ ናሳ ክናሻያና፤ ኖ ‘ኬ ናሳ እሳም ጎባና ኬጎባይ’ ሃማንቱ ኤና ፓይላ ውልሳ ቱንሥሮ ይእስዲና።
7. ኮዶን ኤና ሃምን ዳቃናይና፤ ‘ካ ሃምን ዳላያና፤ ንማቱ ኪም ዎዴሴ፤ ሃምንም ዎቲ ዎዳሌ ና’ ክጊያ ኬያማዶ።
8. ሃያንቱ ኬ ኪም የዳንቱ ዴሲዲና፤ ኬ ዎይንን ሃምሮኻ ቡላንቱ ቡዶሮ ዳብዲና።
9. ታ ናንሢ ኤያ ዎይንን ሃምንሣ እምባ ሃር ክያየ ሃማንቱ የቃቤ? ኖ ናአና ክናእይ፤ ኤና ሃምን ዳቃናይናም ዴሳና ክዴሳይ፤ ዎይንን ሃምንካሞ ኤና ዋኒዛራ ኤልቅማና ክኤልቅማይ።
10. አፓ ዋርቃትሮ ይንታ ሃማያም የቲህ ናባባዳዩው፤ ኤና አኖን አሽካይና ይቦዋዳ ሱናስ አጋ አኖንሳ ጉራ ማቲዲና።
11. ጌጳ አጋም ሃይዲና፤ እንኖኻሞ ዎሳ አፕንናንቱ ካልሎን የር ዋና ማቲዲና?”
12. ዳይንሣ ክጌያዳ ኬናንቱ ኮዶንም ኬ ይዴሳዶንታኻ ኪም የዳናንቱ ዛግዲና፤ ኮዶንካሞ ኬ ዛርስንም ይኩርቲንዳዶንናንቱ ኪም ጋራንቱ ያእዲና።

ብታ ቁሳርናንቱ ግብርን ካሻዳይኖ

13. ሃያንቱ ኪም ዴላቅካ ዳብንሻናንቱ ኬ ፋራሳዊይናቤ ሄሮዶስ ኤናቤ ግዶርካ ኤዲ ክዛራ ቡልዲና።
14. ኬኻሞ ናዴ ክግያ ይንታና ኬያማዶ፡- “እስታማራዮ፤ ያ ጎንዴ ኤዲ ሃዶንም ዎቲህ ዴስዲና፤ ኤናሳ ዎቲም ሃሼዲሞንታኻ ያ ኤዲም ፓሊማሞ፤ ባሪያሳ ጎይንም ሶጎ ጎንዴና ሃታማርሳይ፤ ኤሳንካ ቁሳርናንቱ ግብር ካሸንቶ ዛግሳሞ ኮዛግሳይኖ ሞ ዛግሳይ?

- 15. ኤ ዎቲህ ዎካሻያሞ ሞ ካሻን ዎጋሬ?” ኮዶን የሱስ ኬ ካይስንሦ ኤዲ ኬዶን ዴሳንቴ፤ “የቲህ ሃርናንቴ ኢም ዳብንሻናንቴ የዛጌ? ይንዳ ዲናር ካላ እናንቴ ባአማቴ፤ እሼዴና” ኬግያ ክያማዶ።
- 16. ኬኻሞ ክናንቴ ባአቴ ናእዲና። ኖ ኬግያ “ካ ሃው ዎቲቴ? የራ ዛራን ኡካዳዳ ሃው ጋንታቴ ና?” ክያማዶ። ኬኻሞ ክግያ “ቁሳር ጋንቲና” ኬያማዶ።
- 17. የሱስካሞ ቁሳር ጋይናም ቁሳርናንቴ ባሪያ ጋይናም ባሪያናንቴ እምማቴ ና” ኬግያ ክያማዶ። ኬኻሞ ኪም የርሽዲና።

ኬሞንቤ ዴምጲንባራ ዳጳንቤ

- 18. አጋሳኻሞ ራስባራ ኤና ጃዳና ዴምጲንባራኻ ዳጲማሞ ሃማንቴ ጌያይና ሰዱቃዊይና ናዴ ይንታ ሃማንቴና ክካላ ኬአይሳዶ፤
- 19. “አስታማራዮ፣ ኤዲ ካላሳ እንዳናሳ ሜ ኬማንቴ ናሶ አዲማ ክጂና፤ ኤያ አጋሳ ሜንም እንዳ ናሳ ኬማንቴ ሜቴ ክሳም ክዎይሴኻናንቴ ሙሴ ዎናንቴ ዋርቃትሮ ኡክዲና።
- 20. ታ ክሳ እንዳ ናና ሦጳና ዳና፤ ናሳ ቶይዳ ሜ ኬማንቴ ይሳ ሜቴም ዎይስማ ጃይዲና፤
- 21. እንዳ ናሳ ላንሣ ኤስንም ኬማንቴ እሺማሳ ሜቴም ዎይስማ ጃይዲና፤ ናሳ ማክንሳኻሞ ጎያ አጋኻ ጃይዲና፤
- 22. ናና ሦጳና ውል ኤስንም ኬምዲና፤ ኮዶን ኬ ፓይላ ውል ይሳ ሜቴም ዎይሳድማሞ፤ ቱንሥሮ ኤስኖ ጃይዲና።
- 23. ታ ናንሢ እንዳ ናና ሦጳና ፓይላ ውል ኤስም ኬ ኬማዶንታኻ ቤሬ ዴምጲሮኻ ይዳጲና ሃው ሜ ኮዴና?” ክግያ ኬያማዶ።
- 24. የሱስካሞ ይንታ ሃማንቴና ኬናንቴ ክማሳዶ፡- “የቲህ ይንናንቴ የዳንባይኖ ዋርቃትና ጋዛናቤ ባሪያሳ ካንታንቤም የዴስሞንታኻና!
- 25. ኤና ጃዳና ዴምጲንባራ ይዳጲና ጳ ፖላሮን ዳና ባሪያሳ ኤርጎን ኤና ግያና ኬዳይ፤ ኬምማሞ፤ ኬማዲማሞ።
- 26. ኮዶን ኤና ጃዳና ዴምጲንባራ ኬዳጳይንም ባሪያ ቃዋሮ ‘እንታ አብራሃም ባሪያ፣ ይሳቅ ባሪያ፣ ያዕቆብ ባሪያና’ ክያማዶን ዋርቃትንሣ ኢሮጎ ሙሴ ክጌያዶን የቲህ ናባባዳዬው?
- 27. ባሪያ ኤና ሳዳንካ ዳና ባርዮና ኤና ጃዳና ባርዮ ትይማሞ፤ አጋታኻ የቲህ ጌጲ ዳምብዲና።”

ኪሊማስ ጌጳ

- 28. ኤና ሙሴ ዳምብን ኡካይና ግዶርካ ኤዲ ካላ ናዴ ኬ ክትምካ ኤሳርዲና፤ የሱስ አይሳ ክካላ አይሳዳናንቴ መልስ ልክ ክእማዶንም ኤያ ጳቅሳንቴ ክግያ፤ “ኤሳንካ ዳምብና ጌይዳዳና ግዶር ውል ካላ ሳጋ ዳምባ ሃማቴ?” ሃማንቴ አይስዲና።
- 29. የሱስካሞ ይንታ ሃማንቴ ክናንቴ ማሲዲና፡- “ዳምብና ውል ካላ ሳጋ ዳምባ ካና፤ ‘ያ እስራኤል ኤሳርማ፤ ጌጳ ዎሳ ባሪያ፤ ባርዮ ካላና፤
- 30. ያኻሞ ባሪያ ሃሳ ጌጳም ሃሳ ዎይላምሮኻ ቡላቴቤ፤ ሃሳ ሳዳንካቤ፤ ሃሳ ቃቦንካቤ፤ ሃሳ ካንታንካቤ ናሽማ።”
- 31. ዳምባ ላንሣኻሞ ካና፤ ‘ሃሳ ጉልን ኤናም ፓይላ ሃም ሃናሻያግያ ናሽማ።’ ዳምብና ክናሳ አባራ ዳምቤ ሳጊ ቆልማሞ።”
- 32. ኤያ ሙሴ ዳምብን ኡካያ ክግያ ይንታና ክያማዶ፡- “አስታማራዮ፣ ያ ልኪና ሃጌያዶ፤ ኖ ካላ ሶጎ ክዶንቤ ክሳ አባራ ባርዮ አብ ኮቆልሞንቤ ሃጌያዳ አጋ ልኪና ሃጌያዶ።
- 33. ኪም ሃሳ ዎይላምሮኻ ቡላቴቤ፤ ሃሳ ቃቦንካቤ፤ ሃሳ ካንታንካቤኻ ናሻዳይኖ፤ ሃያንቴ ሃሳ ጉልን ኤናም ሃም ሃናሻያግያ ናሻዳይኖ ቆላቤ የራ ባሪያ ናንቴ ኮቃዳይና ፓይላቤ የራ ዋኒ ባሪያናንቴ እንዳይናቤሳ ሳጊና።
- 34. የሱስካሞ ክናንቴ ኤያ ጎንዴ ክማሳዶን ሼዳንቴ ኤያ ግያ፤ “ያ ባሪያሳ ማንግስትን ካላ ፔጌ ትማሞ ሃዶና” ክያማዶ። አጋሳ ራስባራ ኤዲ ክካላ አይሶ አይሳናንቴ ዛጋዳ ቆልማሞ።

ክርስቶስ ሃው ናሱቴ?

- 35. የሱስ ባርዮን አኖንሣ ሻንሮጎ ይታማርሳን ዋዳንካ ይንታ ሃማንቴና አይሶ ክአይሳይ፤ “ኤና ሙሴ ዳምብን ኡካይና ክርስቶስ ዳዊት ናሶና ሃስ ኬያሜ?
- 36. ዳዊት ይባራንካ ኡስን ጋዛንካ ክሳ ጌይዲ፤ “ጌጳ ጌጳ እሳናንቴ፤ ‘ጋላ ሃሳም ሃሳ ራንሣ ሾባራ እሳ ሃያዛራ ያ እሳ ምዛቅባራ ዳርቅማና’ ክያማይና” ክያማይ።
- 37. ታ ናንሢ ዳዊት ‘ጌጳ እሳ’ ክያማይና ሃስ ዳዊትሳ ናሶ ክይ?” ዛርስኖ ጳጳሮኸኸኸ ኪም ዋዛኸ ኤሳርቴና ኮይ።
- 38. ኖ ኬም ይታማርሳን ዋዳንካ ኬግያ ይንታና ክያማይ፡- “ኤና ሙሴ ዳምብን ኡካይና ካላንካ የም ማንክማቴ፤ አፓላን ጉድጳንም አርሳንቴ ያያና ኬዛጋይ፤ ጋባን ጳልና ግድር ጎብንታ ጌሶና ኬዛጋይ፤
- 39. አይሁድናሳ ምስኮን አኖሮ ቦርኮቶና ጻልና ኬዛጋይ፤ ድግስን ራቅሮ ጎብንታ ራቂና ኬዛጋይ።
- 40. ካይስንሦ ባሪያም ጉዳጽ ምስክቴ ሜና ዳልሶናሳ አኖኒና ኬቡራይ፤ ኬ እግናዛራኸኸኸ ዳባሞኖ ካዳይኖ ሳጊና።

ኤስን ዳልሶኖ ብራ ኮእማዳ

- 41. የሱስ ይንግድር ብሬን አርሳዳን የርንካ ልኪ ዳርቃንቴ፤ ኤዲ ጳጳሮ ባርዮን አኖንሣ ብሬን ይንግድር አርሳዳን ሳጥንንዛራ ብሬን ኬአርሳይንም ሼድቴና ክይ። ኤዲኖ ዎድሞኖ ጳጳሮ ብሬ ጳጳሮ አርስዲና።
- 42. ኮይን ኤዲ ሜ ዳልሶ ኩውፒ ካላ ሳንቲም ካላ ኸላ ሳግምና ናስን ግድርካ አሽካዳዳናም ሳንቲም ላማ ሳጥንሣ ኢሮ አርስዲና።
- 43. የሱስካም ይሳ ታማርና ግስማንቴ ይንታና ክያማይ፡- “እንታ የናንቴ ጎንዴና እጌያይ፤ ኤስኖ ዳልሶኖ ኩውፒኖ ኮኖ ኤና ውል ካላ ሳጊና ኮእማይ።
- 44. ኤና ክና ፓይላ ኮይሶን ይሳ ጳጳሮን ድሮኸ ቁታና ኬእማይ፤ ኮይን ና ኩውፒ ዳአንቴ ይሳ ዳናም ፓይላ ቡላንቴ እኒ ይንካ ይዳንግያንዳናም ፑጭ እምዲና።

ፔንሣ ቱንሥሮ የራ ሃማይና

ማርቆስ 13

- 1. ኖ ባርዮን አኖንባራ ክውታና፤ ክሳ ታማርና ግድርካ ካላ ክግያ፤ “አስታማራዮ፤ ሱንና ሃሞንታ ኬይንቤ፤ አኖኖኸኸኸ ሃሞንታ ጎብ ኮይንም ሼድማ ና” ክያማይ።
- 2. የሱስካም ማሳንቴ ክግያ፤ “አኖና ጌጲ ጌጲና ክናም ሃፓው ሃያፓይ? ሱና ዋ ዋዛራ አጋንታ ይዳዛራ ዳማሞ፤ ፓይላ ውል ኮስማና ኬኮስማይ ና” ክያማይ።
- 3. የሱስ ባርዮን አኖንካ የካ ዳብሬ ዘይት ጌማርታዛራ ዳርቃንቴ ክዳኻ፤ ጴጥሮስቤ፤ ያዕቆብቤ፤ የዋንስቤ፤ እንድርስቤ ይንታ ሃማንቴና ክካላ ኬአይሳይ፡-
- 4. “ይንዳ ዎናንቴ ጌይማ፤ የራ ክና ፓይላ ሃ ኬያሜ? የራ ክና አኸራ ኬያምማ የራ ሃማያ ሃርቴ?”
- 5. የሱስ ኬግያ ይንታ ሃማን ካርስዲና፡- “ኤዲ ካላኸኸኸ የም ሱዳን ኮጋራኸኸኸናንቴ የም ማንክማቴ፤
- 6. ኤዲኖ ጳጳሮ ‘እንታ ኖና’ ሃማንቴ እሳ ናብንካ ናአና ኮናአይ፤ ኤዲ ጳጳሮካም ሱዳና ኬሱዳይ።
- 7. ባንቆንቤ ባንቆንቤሳ ዴላቅ የኤሳርና የቃሥምናኖ፤ አጎኖኸኸኸ ሃምማና ኮያማይ ካላኸኸኸ ሽዲማሞ፤ ኮይንካም ቱንሥኖ አኸራና።
- 8. ቶርስኖ ዋ ቶርስን ዋዛራ፤ ማንግስት ዋ ማንግስት ዋዛራ ዳጳና ኮዳጳይ፤ ራቅ ጳጳሮ ግድር ዚጋንቤ ዳቆቤ ዳና ኮዳይ፤ ጋሎና እግና ፓይላ አኸራ እሢማንሣ ካርሲና።

9. ኮዶን የቲህ የናንቴ ፓካልዲማቴ፤ ኤና የም ኤና ብቶን ታካይናናንቴ ሳስካንቴ እማና ኬእማይ፤ አይሁድና ምስኮን ኦኖን ግደር የም ዳና ኬዳይ፤ እሳ ማኚ የዴካናንቴ እሳ ናብንካ ሃማንቴ ኤና ፔንሣ ጋርናቤ ኤና ፔንሣ ብትናቤሳ ዎትሮ ዎያና የዎያይ።
10. ኮዶን ብርሳንቴ ቶርስን ፓይላ ውል ናንቴ ደላቅን ገሊንም ኮጌይዴ።
11. የም የዳንቴ ብቶንዛራ ባዳያ ዋዳስካ ሳአታ አጋካ የናንቴ እንዳይናም ጌይማቴ፤ ሃር ዎጌይ ሃማንቴ ብርሳንቴ የቃብምናኖ፤ ደላቃይኖ ኡስኖ ጋዛኖና የቲህ ትማሞ።
12. እንዳ ናሳ ይሳ እንዳ ናሳም፤ እንባካም ይሳ ናሳም ዴሳዴካናንቴ ሳስካንቴ ኪም እማና ኬእማይ፤ ናናካም እምባናቤ እንዳናቤናንቴ ኤሳርማሞ፤ ኬምካም ዴሳና ኬዴሳይ።
13. የቲህ እንካ ሃማንቴ ኤዲ ፓይላ ውልካ ቶዛዳድዳና የዳይ፤ ኮዶን ኤያ ቱንሥንዛራ ዋቻዳዳ ዳቃና ክዳቃይ።
14. 'ካዮን ሲያሞን' ዎያዲሞን ራቅሮ ዎያንቴ የሼዳያ ዋዳስካ፤ ዋርቃትን ናባባዳ ክዶቅቤ፤ ኤና ይሁዳ ግደር ዳና ጌማራዛራ ኬጎቤ።
15. ኤያ ኦኖንሣ ዱርሮን ዳካም ሃንቻን ክጋሬ፤ ኮይና ኢሮን ዳናም ቡላናንቴ ይሳ ኦኖንዛራ አርዳን ክጋሬ።
16. ኤያ ይሳ ሃምሮን ዳካም አፓላን ይሳም ቻናንቴ ኦኖንዛራ ማታን ክጋሬ።
17. ሮሮና እግናካ ሜና ሲርማናቤ ሜና ናናም ቆአሻይናቤናንቴ ሃይ!
18. ጋሎኖ ኦጎኖካም ባርግን ዋዳንካ ዳአን ኮጋሬካናንቴ ምስክማቴ።
19. ቤሬ ኦጎካ ኦና ብራንቴ ባሪያ ፔን ክዎዳዳካ ካርስንቴ ካ ዎዳዛራ ሃያንቴ ቤሬ ብራዛራካም ይንካን የክንሣዲማን ቆልማ ጋሎ ጌዲና ኮዳይ።
20. ጌጳ እኒ ሮሮናም ክዴሳድምና እኒ ኤዲ ካላካም ዳቅማሞ፤ ኮዶን ኤና ካማዳዳና ኖ ይናንቴ ይካማዳናናንቴ ሃማንቴ ኖ ሮሮናም ዪድስዲና።
21. ዋዳ አጋካ ኤዲ ካላካም የግያ 'ክርስቶስ ኮታሪና ክዶ' ዎይካም 'ኦጎታሪና ክዶ' ክያምና የአምኒናኖ።
22. ፖጋሞን ኤና ክርስቶሲናቤ ፖጋሞን ኤና ባሪያሳ አፖን ጌያይናናቤ ዳጳንቴ፤ የራ ሃሚማን ግያንዳናምቤ የራ ሃሊናቤም አሽካንቴ ኬ ይቻላያዳና ኤና ካማዳዳናም ካውል ሱዳና ኬሱዳይ።
23. አጋታካ ፓካላ ዳማቴ፤ አካራ ዋዳኖ ኮየስክማ እንታ የናንቴ ጌይዲና።
24. ቤሬ ዋዳ አጋካ ጋሎን ኦጎሳ ራስባራ ሓዮኖ ፅፓና ኮፅፓይ፤ አርፒኖካም ሮጲማሞ፤
25. ኤዚናካም ፖላንባራካ ቲርካና ኬቲርካይ፤ ፖላንሣ ካንታናካም ዋጃና ኬዋጃይ።
26. ዋዳ አጋካ ኤዲ ናሶ ካንታ ጌዲካቤ፤ ጎሼንቤካ ማታንቴ ሉፒንካ ክናአይንም ሃፓና ኬያፓይ።
27. ኖ ይሳ ኤርጎን ኤናም ጎእሳንቴ፤ ፔንሣ ማራና አይድና ባራንካ፤ ፔንሣ ማራሮካ ካርሳንቴ ፖላንሣ ማራንዛራ ኤና ክናንቴ ካንዳዳናም ፑኡሻና ኬፑኡሻይ።
28. ዳይንሣም ባላስን ሃቃስ ካላ ታማርማቴ፤ አንትና ጫጋን ኬካርስናቤ፤ ቃልጳና ኮዳን ኬካርስና ባርግኖ ኮየስካዶንም የቲህ ደሳና የዴሳይ፤
29. ሃያንቴ የራ እግና ሃምማን ኬካርሳዶን የያፒና፤ ክሳ ናእንቶኖ ኮየስካዶንቤ ኖ የሳ ሻንን ካላ ክሳናዶንም ደስማቴ።
30. እንታ የናንቴ ጎንዴና እጌያይ፤ የራ እግናሳ ሃምማዛራ ሃርያኖ ኮኖ ሳግማሞ፤
31. ፖላንቤ ፔንቤ ሳጋና ኬሳጋይ፤ ኮዶን ደላቅኖ እሳ ሳግማሞ።

ሮራቤ ሳአታቤሳ ናእንቶንም ደሳዲማሞ

32. ኮዶንካም ሮራ አጋም ዎይካም ሳዓታ አጋም ባሪያ ዎምባሳ አባራ ጳ ፖላሮን ዳና ኤርጎን ኤና ዎይ ናሳ ዳናካም ኤዲ ካላካም ደስማሞ።
33. አጋታካ ዋዳስ ሃ ክናአይንም የደስሞንታካ፤ የም ማንክማቴ፤ ዋቻዳንቴካም ምስክማቴ።

- 34. አጋኸም እኖን ይሳም ካይስናናንቴ ጋራንቴ፤ ካይስናምኸም ኬሳ ዋድማናዛራ አርሳንቴ፤ ዳቅማን ኤያ ዋቻዳንቴ ክዳቃኔኸናንቴ ኤልቅማንቴ ያአዳ ኤዲና ክታኸይ።
- 35. ታ ናንሢ ኤያ እኖን እምባ እባንን ወይካም ግድጋልት ወይካም ባቻና ኬኤሊካ ወይካም ፔንሣ ሶፅም አፖ ክናአይንም የደስሞንታኸ ዋቻዳንቴ ዳቃንማቴ፤
- 36. የደስማ ናዴ ራታንቴ የዳኸ የም ሃፓን ክጋሬ!
- 37. የናንቴ የራ እጌያዳናም ኤና ፓይላ ውልናንቴ ጌያና እጌያይ፡- ዋቻዳንቴ ካልማቴ!”

ኤስኖ የሱስም ዋክቲንካ ቃዳዶኖ

ማርቆስ 14

- 1. ፋስካንቤ ባላሻንቤ ባዓላ የስካናንቴ ሮሮ ላማ ኮሽዳና ካህንናሳ ኤና ጋርናቤ ኤና ሙሴ ዳምብን አካይናቤ ጋሮኸ የሱስም የዳንቴ ጎይ ይንካ ኪም ይዴሳያ ዛግቴና ኬዶ።
- 2. ሃያንቴኸም “ዛርስኖ ወዛራ ደላቅ ዛርቦ ዳሳን ኮጋሬኸናንቴ ባዓል ሮሮ ዳን ኮጋሬ” ሃምቴና ክጊያ ኬዶ።
- 3. ኖ ቢታንያ ግድር ሙልካንባን ኤያ ስምኦን ሃንዳያ እኖሮጎ ዳርቃንቴ እስምቴ ክዳኸ፤ ሜ ካላ ሻንንሣ ዋቸን ናርዶስ ሃማንቴን ግስንዳን ዋክቲን ጫንቃላማ አልባስጥሮስ ቃርምሸካ ባአንቴ ናእዲና፤ ና ቃርምሻም ዴሳንቴ ክሳ ሜቴሮ ዋክቲን ይንቅስዲና።
- 4. ኤና አጎታር ዳናሳ ዋኒ የራኸ ዳጋሳንቴ ክጊያ ይንታ ሃምቴና ኬዶ፡- “ዋክቲንም ሱን ሃርናንቴ ካይሳዴ?”
- 5. ዲናር ማቶ ማካንሣ ጳባራ ሻንሻንቴ ብሬናም ኤና ኩፕናናንቴ እኒ እማናንቴ ቻላና ቻልዳይ ሃማንቴ ኤስንም ኬ ጂቢዲና።
- 6. ኮዶን የሱስ ይንታና ኬግያ ክያማዶ፡- “ኮም ጋርማቴ፤ ሃርናንቴ ኮም የጋልንሼ? ና የር ባል እናንቴ ሃይዲና።
- 7. ኤና ኩፕና ሮሮ ውል የላማና ኬዳይ፤ ሮራ የዛጋያኸ ኬም ኬልሻናንቴ ቻላና የቻላይ፤ ኮዶን እንታ ሮሮ ውል የላማ ክንካ ዳማም።
- 8. ና እናንቴ ሃያናንቴ ይቻልዳግያ ሃይዲና፤ እሳ ዱክንናንቴ ኮዴኸናንቴ ብርሳንቴ ና ኢም ቃዲዲና።
- 9. እንታ የናንቴ ጎንዴና እጌያይ፤ ደላቅን ባሊን ኮም ፔን ጋላፕንሣ ራቅና ይንግድር ጌይዳይና ውል ግድር የራ ኮያያዳም ይንካ ኮም ደቅሳንቴ ኮሳ የር ጌያና ጌይዳይ።”
- 10. አጋሳ ራስባራ ታማርና ክሳ ታዲ ላማና ግድር ካላ አስቆሮቱ ፔን ጋንታ ይሁዳ ኪም ሳስካንቴ እማናንቴ ኤና ካህንናሳ ጋርናዛራ ያእዲና።
- 11. ኬኸም እግናም ይኤሳራና ዋዝንዲዲና፤ ክናንቴ ብሬ እማናንቴ ናሽዲና፤ አጋታኸ ኪም ይንካ ሳስካንቴ ይእማያ ዋዳ ልኪ ሃማ ዛግቴና ክዶ።

ጌዳሳ እባንን ዳአንኖ

- 12. እያታ ፋስካን ጋንታም ይንካ ማቻዳያ ባላሻን ባዓላሳ ሮራ ካርሳ ጋላ ታማርና ክሳኸም ክካላ ናዴ ክግያ፤ “ፋስካንሣ እባንን ዳአኖን ሃናንቴ ሃንታር ወክሽኪኸናንቴ ሃዛጌ ና?” ኬያማዶ።
- 13. ኖኸም ታማርና ይሳ ላማም ይንታ ሃማንቴና ክይእሳዶ፡- “ካታማንዛራ ይማቴ፤ ኤዲ ዳንካ ኑንቆን ባስክሳዳ የላማ ኬራና ክኬራይ፤
- 14. እና ይዛራ ክአርዳያዛራ ኪም ጫግማቴ፤ ኤያ እኖንሣ እምባግያ፤ ‘አስታማራ፤ “እሳ ታማርና ላማ ፋስካንሣ እባን ዳአኖንም ይንግድር እሣያ ቸችና ይወድማያ ራቃ ሃማቴ?” ሃምዲና ሃምማቴ፤
- 15. ኖ እኖንሣ እና ጳባራን ዳ ግድር ራቅ ዎርሪ ዴጴ ይንግድር አፓዶኸ ይዳ የናንቴ ዳዋና ክዳዋይ፤ አጋሮ ዎናንቴ አሽክማቴ።”

16. ታማርና ክላኸሞ ዉታንቴ ካታማንዛራ ያእዲና፤ የራ ፓይላ ውል የሱስ ክጌያዳግያ ሃምማንቴ ኬዳሻ ኬ ሃፕዲና፤ ፋስካን ዳኦኖንም አሽክዲና።
17. ኮእባናና የሱስ ታማርና ይሳ ታጲ ላማና ላማ ክንካ ናእዲና።
18. እሥማናንቴ ዳርቃንቴ ኬዳሻ፤ ኖ ኬግያ “እንታ የናንቴ ጎንጴና እጌያይ፤ የሳ ባክሮ ካላ እላማ ክንካ እሥማያ አጋ ኢም ሳስካንቴ እማና ክእማይና” ክያማዶ።
19. ኬኸሞ እልል ጃይዲና፤ ኬ ፓይላ ካላ ካላኸ ክግያ “ኬዳ እንታው እዳይ?” ሃማን ካርስዲና።
20. ኖ ኬግያ ይንታና ክያማዶ፡- “ታጲ ላማና ግድር ካላ እላማ ክንካ ሻርቃንሳ ኢሮ አንን አርሳያ አጋ ኖና።
21. ኤዲ ናሶ ዋርቃትሮ ክሳ ኡካዳዳግያ ያእና ክያእይ፤ ኮዶን ኤያ ኤዲ ናሶም ሳስካንቴ እማያ አጋናንቴ ሃይ! ኤያ አጋም እኒ አዳድድምና ክናንቴ ባሺና ኮዳይ።”
22. ኬእሥምካኸሞ ባላሻንም ቻንቴ ፑጋንቴ ቁንፃንቴ ታማርና ይሳናንቴ እማንቴ፤ “ችማቴ፤ ኮኖ እሳ ዋኖና” ኬግያ ክያማዶ።
23. ሻርቃንካሞ ዳሳንቴ ፑጋንቴ ኬናንቴ እምዲና፤ ኬ ፓይላ ውል ኮግዶርካ ውጭዲና።
24. ሃያንቴ ኬግያ ይንታና ክያማዶ፡- “ኮኖ ኤዲ ውል ናንቴ ይንቅማይኖ ቃሽን ማአስኖ እሳና፤
25. እንታ የናንቴ ጎንጴና እጌያይ፤ ባሪያሳ ማንግስትሮ ዎይንን አፕን ሃሊን እውጫያ ሮራሳ የስካዛራ፤ ናንሢ ካሳ ራስባራ እንታ ኮታርካ ውጭማሞ።”
26. ዋርሳ ዳሳንቴ ቱንሥሮ ዳብሬ ዘይት ጌማርታዛራ ኬ ዉቲዲና።

ጴጥሮስ እንታ ኪም ጴስማሞ ሃንቴ ክዜርማንም የሱስ ብርሳንቴ ጌይድና

27. የሱስ ኬግያ ይንታና ክያማዶ፤ ይንታ ሃማንቴ ዋርቃትሮጎ ኡካዳዳግያ የቲህ ፓይላ እግያ ዎትይ ኪም ጴስማሞ ሃንቴ ዜርማና የዜርማይ፤ ግሽሞን ኤም ዳና እዳይ እያናካሞ ላልማና ኬላልማይ።”
28. ኮዶን እዳዲና ዩም ብራንቴ ገሊላዛራ ያእና እያእይ።”
29. ጴጥሮስካሞ ኤና ፓይላ ሃም ጋራንቴ ኬላልማዳናኸሞ እንታ ሃም ጋራንቴ ይማሞና ክያማዶ።
30. የሱስካሞ ጎንጴና ሃናንቴ እጌያይ ሶታ ካካ አካራ ባቻና እይ ላማ ኬኤልማ እይ ማካም እንታ ኪም ጴስማሞ ሃማንቴ ዜርማና ሃዜርማይና ክግያ ክያማዶ።
31. ጴጥሮስካሞ ሃላማ ክንካ ጃዳያዳናካሞ ካላካሞ እንታ ሃም ካላኸሞ ጋራንቴ ይማሞ ሃማንቴ ጌይዲና ታማርና ዋንካሞ ፓይላ አጎንታ ሃምድና።

የሱስ ጌቴሴማኒ ግድር ምስክድና

32. አጋሳ ራስባራ ራቃ ጌቴሴማሰኒያ ሃንዳያዛራና ኬያእይ፤ የሱስካሞ ይሳ ታማርና ግያ እንታ ቃልቴ እምስኬ የቲህ ኮታር ዳርቅማቴና ኬግያ ክያማዶ።
33. ጴጥሮስቤ፤ ያዕቆብቤ፤ የዋንስቤም ይንካ አንሳንቴ ያእድና፤ ካሎን እልል ጃንቴ ቃብማን ካርስድና።
34. ሃያንቴ እሳ ሳዳኖ እሳ ጃዛራ ካሎን እልል ጃይድና፤ የቲህ ካሮ ዋቻዳንቴ ካልማቴና ኬግያ ክያማዶ።
35. ሾል ያአግያ ሃያንቴ ኮቻሊማያዳና ዋዳስ አጋ ክካላ ክሳጌኸ ናንቴ ምስካንቴ፤
36. አባ አባዮ የር ፓይላ ውል ሃናንቴ ኮቻሊማንታኸ፤ ጋላካም እካላንካ ፔግንስማ፤ ኮዶንካሞ እንታ እቃባዳግያ ዳን ኮጋሬ ሃያ ሃቃባያግያ ኮይና ክያማዶ።
37. ማታቴ ክንና ታማርና ክሳ ፓይላ ዎዳንቴ ኬዳሻና ክያፓዶ፤ ጴጥሮስ ግያኸሞ ይንታና ክያማዶ፤ ስምኦን ያዎዲድው? ሳአት ካላ ናንቴ ኬኬራዳያ ሃም ባሺድው?
38. ጋሎንዛራ አርዳን ጋራናንቴ ዋቻዳማቴ ምስክማቴ፤ ኡስኖ ሼኪምና ኮዶን ዋኖ ዎሳ ካንታ ቃጃና።
39. ፕርካሞ ቃልቴ ምስካ እን ብራን ይምስካዳም ማሳንቴ ምስክድና።
40. ፕርካሞ ማታቴ ክንና አፕ ኬሳ ኮግይዳሻ ዎዳንቴ ኬዳሻና ክያፓዶ፤ የራ ክናንቴ ማስቴይዳናም ኬ ጴስማሞ።

- 41. እያ ማክንሳም ናዴ ይንታና ኪግያ ክያማዶ፤ ታካሞ ዎዳንቴ የኡኩንሳዳዘራው የዶ? የክድና! ዋዳናኖ የስክድና ኤዲ ናሶም ሴሶን ኤናሳ አንሮ ሳስካንቴ እማና እንዳይ።
- 42. ዳዲማቴ ዎኤ እም ሳስካንቴ እማና ናእድና።

የሱስም የዳዲዲና

- 43. አጋዛራ ሃሳውቴ ክዳኝ ታማርና ክሳ ታዲ ላማና ግዶር ካላ አስቆቴ ፔንጋታ ይሁዳ ናእድና፤ ክላማካሞ ክንካ ሃልፓንቤ ቁራንቤ የዳንቴን ዳና ካይናሳ ኤና ጋርናቤ ኤና ሙሴ ዳንብን ታማርሳይናቤ ዛርስናሳ ዞንዛና ካላንካ ንእሳዳዳ ኤዲ ዳፅና ዶኖ።
- 44. ሳስካንቴ እማያካሞ እንታ እሱንቃያ አጋ ኖና ኪም የዳንቴ ፃሊ አንስማቴ ሃማንቴ ብርሳንቴ ኪናንቴ ጌይድና።
- 45. ይየስካናካሞ አጋዛራ የሱስዛራ ናዴ፤ አስታማራዮ ሃማንቴ ኪም ሱንቅድና፤
- 46. ኤናካሞ የሱስም የዳንቴ ዳክድና።
- 47. ክካላ ኤና ዎያንቴ ዳና ግዶር ካላ ሃልፓን ጉቻንቴ ካይናሳ ኤና ጋራሳ ካይስታሳ ቃሞን ታክድና።
- 48. የሱስ ኪግያ ይንታና ክያማዶ፤ ቃው ኤዲ የዳያግያ ብላ ባቻንቤ ቁራንቤም ባአንቴ እም የዶታው የናአዶ?
- 49. ሮሮ ውል ባርዮን አኖንሳ እሮ ታማርስቴ የላማ ክንካ እዶን የቲህ እም የዳድምን፤ ዋርቃትሮ የራ ኡካዳዳና ኪያሜኻ ናንቴ ኮኖ ፓይላ ውል ሃምድና።
- 50. ዋዳስ አጋኻ ፓይላ ውል ኪም ጋራንቴ ላልምድና።
- 51. ይም ክጫናንቴ ጫርቄ ሾልጮ ዳክዳንቴን ዳ ናሶ ባርሻ ካላ የሱስም ጫግቴና ክዶ። ኤናካሞ ናሳ ባርሻ አጋም ኪየዳና፤
- 52. ጨርቃ ይዳክዳዳም ዳባንቴ ፑርድንቆ ጎብቴ ያእድና።

የሱስ ኤና ብቶን ታካይናሳ ዎትሮ

- 53. የሱስም ካይናሳ ኤያ ጋርናዛራና ኪንሳዶ፤ አታር ካይናሳ ኤና ጋርናቤ ዞንዛናቤ፤ ኤና ሙሴ ዳምብን ታማርሳይናቤ ፓይላ ፑጭድና።
- 54. ጴጥሮስ ፔጌካ ጫጋዳቴ ኤያ ካይናሳ ጋራ ሞሮንዛራ አርዳንቴ አጎታር ኤያ ካይናሳ ጋራሳ ካይስና ላማ ኖን ሾሊንዳቴና ክዶ።
- 55. ካይናሳ ኤና ጋርናቤ ኤና ብቶን ታካይናቤ የሱስም ዴሳናንቴ ኤዲ ክዛራ ማኛሞ ዎያያና ኪዛጋዶ፤ ኮዶንካሞ ኤዲ ማኝ ሃፓናንቴ ኪ ቻሊድማሞ።
- 56. ኤዲ ዳፅ ክዘራ ማኛሞን ኪዎያዶንካሞ አፖ ኪሳ ኪም ጋአድማሞ።
- 57. ኤና ዋን ይንታ ሃማንቴና ፖጋሞኻ ክዛራ ኪታርጃዶ፤
- 58. ኤያ ካሃ ኤዲ አንካ ባሪያ አኖን አሽካዳዶንም ኮሳንቴ ሮሮ ማክንሳ እር ኤዲሳ አንካ አሽካዳድማ አኖ አብ ዎይሳና እዎይሳይና ሃማንቴ ክጌያዶን ዎትይ ኤሳርዲና።”
- 59. አጎንታ ሃንዶኝ ታኻሞ አፖ ኪሳ ኪም ጋአድማሞ።
- 60. ካይናሳ ኤያ ጋራ ዳደንቴ ክሳ ዎትሮ ዎያንቴ፤ ኤናሳ ሃዛራ ታርጃዳይኖ ኮኖ ሃርቴ? ሃርቴ ኪናንቴ አፖ ሃማስሞኖ? ሃማንቴ የሱስ ካላ አይሰድና።
- 61. ኮዶን የሱስ ታካሞ ጫክ ሃማንቴና ክዶ፤ ካላካሞ አፖ ኪዛራ ማሳድማሞ፤ ኤያ ካይናሳ ጋራ ፕርካሞ ጌዳ ናሳ ክርስቶስ ያው? ሃማንቴና ክአሳዶ።
- 62. የሱስካሞ ይኒ እንታና፤ ኤዲ ናሶ ብታሳ ምዛራቅባራ ዳርቃቴ፤ ፖላንሳ ሉፒንካኻሞ ክናአይንም ሃፓና የያፓይና ክያማዶ።
- 63. ኤያ ካይናሳ ጋራካሞ አፓላን ይሳም ሃአሳንቴ ይንታ ክያማዶ፤ ካሳ አባራ ማኛሞ ሃሳማ ዎዛጌ?

- 64. እርሞና ክሳም የቲህ ኤሳርድና፤ ታ የካላ ናንስ ሃር ኮታኬ?።፤ ኬካሞ ዴሳዴ ሃማንቴ አፖ ካላኻ ክዛራ ብቶን ታክድና።
- 65. ዋዳ አጋኻ ኤና ዋን ክዛራ ፓፅን ማማን ካርስድና፤ አፕ ክሳም ክጫንቴ ኪም ያቅቴ ይንዳ ሃም ዳዳ ሃውቴ ዎናንቴ ጌይማ!። ሃሚቴና ኬዶ። ካይስናኻም ኪም ጫአዳቴ አንስድና።

ጴጥሮስ የሱስም እንታ ጴስማሞ ሃምድና

- 66. ጴጥሮስ ግብንሳ ቸባራባራ ክዳኻ ኤያ ካይናሳ ጋራሳ ሜና ካይስና ግዶር ካላ ክዛራ ናእድና፤
- 67. ጴጥሮስ ኖን ካሾልዲካ ሃፓንቴ ኪም ላይ ሼዳንቴ ያኻም ናዝሬት ግዶር የሱስ ላማ ክንካና ሃዶና ኮያማዶ።
- 68. ኮዶን ኖ ሃይያን አጎም እንታ ጴስማሞ እናንቴ አርድማሞካም ሃማንቴ ዜርምድና፤ ሃያንቴ ሙዳፖን አርደንዛራ ያእድና ዋዳን አጎካ ባቻና ኤልድና።
- 69. ካይስቶኖካም ኤና አጎታር ዎያንቴ ዳናግያ ኤያ ካኻም ኬግዶር ካላ ሃማንቴ ፕርካም ጌይድና።
- 70. ኮዶን ፕርካም ኖ ዜርምድና። ዋዳ ቶካሳካም ራስባራ ኤና አጎታር ዎያንቴን ዳና ጴጥሮስ ግያ ገሊላ ኤዲ ሃዶንታኻ ያሃካም ኬሳ ካላና ኬያማዶ።
- 71. ኮዶን ኖ ኤያ የጌያያ አጋም እንታ ጴስማሞ ሃማንቴ አሺንሻንቴ ኪም አሻንካም ካርስድና።
- 72. አጋዛራ ባቻ እያ ላንሳም ኤልድና፤ ጴጥሮስካም አካራ ባቻ ኬኤልማ እይ ማካም እንታ ኪም ጴስማሞ ሃማንቴ ዜርማና ሃይርማይ ሃማንቴ የሱስሳ አፖ ጌያዳዳ ክናንቴ ዶቅ ሃምድና። ሃያንቴ ጌዲ ኤፍድና።

የሱስ ጲላጦስሳ ዎትሮ

ማርቆስ 15

- 1. ቡር ዋዳ ካይናሳ ኤና ጋርናቤ ዞንዛናቤ ኤና ሙሴ ዳምብን ታማርሳይናቤ አይሁድናሳ ኤና ብቶን ታካይናቤ ፓይላ ክንካ ሃሳሞንቴ የሱስም ዳኻንቴ አንሳቴ ቃልቴ ጲላጦስ ናንቴ ሳስካንቴ እንዲድና።
- 2. ጲላጦስካም ያ አይሁድናሳ ብታው? ሃማንቴ አይስድና፤ የሱስካም ያ ጌይድና፤ ሃማንቴ ክናንቴ ማስድና።
- 3. ካይናሳ ኤና ጋርናካም የር ዱፅካ ኪም ቤርንስድና።
- 4. ጲላጦስካም ሃርቴ ይናንቴ አፖ ሃማስሞኖ? ኤና ሃም የር ዱፅካ ቤርንስቴና ኬዶ ሃማንቴ ፕርካም አይስድና።
- 5. ኮዶን የሱስ አፖ ካላካም ማሳድማሞ ጲላጦስ ናንቴ የር ዋና ማትድና።
- 6. በዓልን ዋዳንካ ዛርስንሳ ኬናንቴ ቡልዴኻ ናንቴ ዳክን ኤያ ኬዛጋያ ቡልዳያ ዳምብ ኬሳ ዳይድና።
- 7. ዋጭንካ ሃማንቴ ኤና ኤዲን ዴሳዳ ጋሮን ኤና ላማካም ክንካን ዳካዳዳ ባርባን ሃማንቴን ግስንዳያ ኤዲ ካላ ዳይድና።
- 8. ዛርስኖ ናዴ ሌሌ ዳዳዳግያ ኬናንቴ ሃይዴኻናንቴ ጲላጦስም ምስክድና።
- 9. ጲላጦስኻም አይሁድናሳ ብታም የናንቴ እቡሌኻናንቴ ዛጋው የዛጋይ?። ሃማንቴ ኬካላ አይስድና።
- 10. አጎኖካም ካይናሳ ኤና ጋርና የሱስም ይናንቴ ሳስካንቴ ኬእማዶኖ ጋሮ ኮዶንም ይዴሳዶንታኻና።
- 11. ኮዶን ኤና ካይናሳ ጋርና ራቃ ክንታሮጎ ባርባንም ኬናንቴ ቡጴካናንቴ ዛርስን ላማ ክንካ ዋሳውዲና።
- 12. ጲላጦስ ፕርካም ታ ናንስ አይሁድናሳ ብታ ሃማንቴ የጌያያም ሃስ እያዬኻ ናንቴ የዛጌና? ኬግያ ክያማዶ።
- 13. ኬ ፍርካም ዝቲማ ሃማንቴ እላቲድና።
- 14. ጲላጦስካም ሃርናንቴ? ሃርቴ የራ ዛርባ ክሴሳዳና ኬግያ ክያማዶ። ኮዶን ኬ ካሎን ዝቲማ ሃማንቴ እላቲድና።
- 15. ጲላጦስካም ዛርስንም ዋዝንሳናንቴ ባርባንም ኬናንቴ ቡልድና፤ ኮዶን የሱስም ዳይሳንቴ ዝታዴኻንቴ ሳስካንቴ እምድና።

ዎታዳርና የሱስም አልንስድና

- 16. ዎታዳርና ኘራይቶሪዮን ሃንዳያ ራቃዛራ ኤያ ፔንሳ ብታ ሞሮንዛራ ኪም አንስድና፤ ሳራውትናም ፓይላ ራቅ ካላዛራ ኬፑእሻዶ።

- 17. አፓላን ዛዎን ኪም አርስሳንቴ ኡኩምን ጋሊግያ ቁራንቴ ክሳ ሜቴሮና ኪያዶ።
- 18. ሃያንቴ አይሁድናሳ ብታ ገልኖ ሃንቴ ኮዴ!” ሃንቴ ኬ ኪም ጌስዲና።
- 19. ኬ ሜቴ ክሳም ቴሌኻ ዳይዲና ፓፅንካሞ ክዛራ ማማዲድና፤ ኮንፓርሳንቴ ኬ ክናንቴ ጉንስንዲድና።
- 20. ኪምካሞ አሊንሳንቴ ራስባራ አፓላን ዛዎን ክዛራዶን ቻንቴ አፓላን ክናንም ኪም አርስሳዲድና፤ ኪም ዝታናንቴኻሞ አንሳዲድና።

የሱስም ዝታዳኖ

- 21. አሌክሳንድሮስቤ ሩፎስቤ እንባ ስምኦን ሃንዳያ ቀሬና ፔን ኤዲ ካላ ገጠርን ባራ ክንካ መስቀልንም ክቤኤኻናንቴ ኪም ኬ እሽክንሲድና።
- 22. ሃንቴ የሱስም ራቃ ምክልሳ ሜቴን ጉሳ ሃንቴን ግስንዳያ ጎልጎታዛራና ኬአንሳዶ።
- 23. ከርቤን ላማ ምርሳጳዶን ሃቃስ ወይና ዝአንም ኬ ክናንቴ እንዲድና፤ ኮዶን ኖ ውጫዲማሞ።
- 24. ሃያንቴ ኪም ዝታዲድና፤ ኬዛራ የስካያ ኮዶንም ዴሳናንቴ ቡክና ኬዳባዶ አፓላን ክሳም ኬ ኪም ካሺዲና።
- 25. ኪም ኬዝታን ዋዳኖ አካራ ቡርንሳ ሳዓት ማካንቤ ግዶርና ኮዶ።
- 26. ዋርቃታ ኪም ይንካ ቤርንሳዳ አይሁድናሳ ብታ ሃማያና።
- 27. ክላማ ክንካ ኤዲ ድብ ላማም ካላም ክሳ ምዛቅባራ ሞም ክሳ ዋርካታባራ ሃያንቴ ዝታዲድና።
- 28. አና ዋርቃትናሳ ኤና ጋሮን ኤናላማ ኪም ፓይዳዲድና ሃንዳዶኖ ጎያ አጋኻ ሃምድና።
- 29. ኤና ጎይንካ ሳጋይናካሞ ሜቴ ይሳም ጁግቴ እርሞ ዱፅ ኪም እራንቴ ይንታካሞና ሃምቴ ኬዶ፤ ሃያ ሃፓዳይ! ባርዮን አኖንም ኮሳንቴ ሮሮ ማካንሳ እሮጎ አሽካያ ያና፤
- 30. ይንዳ ናንስ መስቀልን ባራን ሃንቻንቴ ሃም ዳክሽማ።”
- 31. ሃያንቴ ካይናሳ ኤና ጋርናቤ ኤና ሙሴ ዳንብን ታማርሳይናቤ ኪም ቦሞንቴ ክግያ ይንታና ኬያማዶ፤ ኤና ሞንም ዳክሽድና፤ ኮዶን ይም ዳክሻናንቴ ቻላዲማሞ።
- 32. ምትይኻሞ ሃም ምአምኔካናንቴ ካ ክርስቶስ ያካ እስራኤልና ብታ ይንዳ መስቀልሮካ ክያንቴ። ኤና ክላማ ዝታዳዳናካሞ ይንታ እርሞ ዱፅካ ኪም እርቴና ኬዶ።

የሱስሳ ዴንዲኖ

- 33. ሳዓታ ላኻ ካርሳንቴ ሳዓታ ሳልዛራ ፔ ሁል ግዶር ፅፓ ማትድና።
- 34. ሳዓታ ሳል ኮማታና የሱስ ኤሎሄ፤ ኤሎሄ፤ ላማ ሰባቂታኔ?” ሃማንቴ ናቅስ ይሳም ዴግ ሃንቴ እላትድና፤ ምክልና ክሳካሞ ጌዳዮ ጌዳዮ ሃርናንቴ እም ሃጋራዴና ሃንፓዶ።
- 35. ኤና አጎታ ምያንቴን ዳና ግዶር ሞን እግናም ይኤሳራና ኤልያስምና ክግስማይና ኬያማዶ።
- 36. ሃያንቴ ኤዲ ካላ ይርካ ቃልቴ ወይንን ዝአን ጋአዶን ፕራኻ ሃያንቴ ክውጩ ካናንቴ የሱስ ናንቴ እምድና፤ ሃያንቴ ይንዳ ጋርማቴ ኤልስ ናዴ ኪም ክያንቸሻም ምያፌና ክያማዶ።
- 37. የሱስካሞ ናቅስ ይሳም ዴግ ሃያንቴ እላታንቴ አጋዛራ ሳዳን ታክዲና።
- 38. ባርዮን አኖንሳ አፓላኖ ጋዳን ዳኻዳዶ ዳኻ ቻንቴ ላይ ችሆ ቱንስንዛራ ራቅ ላማ ኪም ካሺዲና።
- 39. የሱስካ ልክ ምያንቴን ዳ ፖሊስናሳ ማቶናሳ ኤያ ጋራ አጎንታ እላታንቴ ሳዳን ክታኻዶን ይያፓና ኤያ ካሃ ጎንዴንባ ባሪያ ናሳና ክያማዶ።
- 40. ሞዳን አጋኻ ሜና ፔጌ ምያንቴ ሼድቴና ኬዶ፤ ኬሳካሞ ባክሮጎ መግዳላዊት ፔን ጋይኖ ማርያምቤ ያዕቆብ ሾላቤ ዮሳ እንዳን ማርያምቤ ሃንቴ ሰሎሜኻሞ ኬላማ ዳይድና።
- 41. ሜና እግና ገሊላ ግዶር ኪም ጫጋይና ክናንቴ ሞድምቴን ዳናቤና፤ ሃያንቴ ክላማ የሩሳሌም ዛራ ሜና ዱፅና ናኦዳና ሞን ዳይድና።

የሱስም ዱካዲዲና

42. ፔኖ እባናዳቱ ንቴና ኮዶ ኡኩን ሳን ሮራ ናንቴ ይንካ ሼካዳያ ሮራ የስክድና፤
43. ኤና አይሁድናሳ ብቶን ታካይና ግደር ካላ ባሪያሳ ናእንቶን ዋዳንም ካሊቴንዳ አርማትያስ ፔን ጋንታ ዩሴፍ ዎይላም ዋቻዳንቴ ጲላጦስ ካላ ቃልቴ የሱስሳ ዋንም ምስክድና።
44. ጲላጦስካም ኦጎንታ ይርካ ክጃዶን ይኤሳራና የርሽድና፤ ፖሊስናሳ ማቶናሳ ጋራም ግስማንቴ ክጃህ ሳዓት ሜም ኮዩስካዶንም አይስድና፤
45. ክጃዶንም ፖሊና ማቶናሳ ጋራኻላ ኤሳራንቴ ዋን ክሳም ዩሴፍ ናንቴ እምድና።
46. ዩሴፍካም ዋን ክሳም ሃንቺቫንቴ አፓላንካ ሳራንቴ ላይታሮካ ዱክን አሎን ኮይዳዶንሳ እሮጎ ዱክድና፤ አሎንሳ አፖንኻም ሱንካ ሹፑድና።
47. ማግዳላዊት ፔን ጋይኖ ማርያምቤ ዩሳ እንዳን ማርያምቤ ሃንታር ዱክቴ ኬዶን ሽድቴና ኬዶ።

ዴንጲሮኻ ዳዲዲና

ማርቆስ 16

1. ኡኩንሳን ሮራ ክሷንኳ ራስባራ መግዳላዊት ፔንጋይኖ ማርያምቤ ያዕቆብ አንዳን ማርያምቤ ሰሎሜቤ ቃልቴ የሱስሳ ብሽንም ቃዳናንቴ ዋአትና ኬሻናዶ።
2. ሳንታሳ ሮራ ካርሳጋላ አካራ ቡር ዋዳ ሓያላ ውታሃ ዱክን ራቅንዛራካም ይቴ ዳንቴ፤
3. ዱክንሳ ሙልዳፖሮኻ ሃውቴ ዎናንቴ ሱንንም ውንኩርሳያ? ሃማንቴ ክንካ ሃሳውቴና ኬዶ።
4. ካቺ ሃማንቴ ኬሽድና ሱንኖ ጌዶኖ ዱክንሳ ሙልዳፖሮኻ ውንኩርስማንቴ ኮዳኳና ኬያፓዶ።
5. ዱክንሳ እንዛራ ኬአርዳ ኤዲ ጋር አፓላ ጫውል አርሳዳ ምዛራቅባራ ዳርቃንቴ ክዳኳ ሃፓንቴ ኬ ቃስምድና።
6. ኮዶን ኖ ኬግያ ይንታና ክያማዶ፤ የቃስምናኖ፤ የዛጋያ ዝታዳዳ ናዝሬት ጋንታ የሱስና ኖ ዳዲድና ኮታር ቆልማም ኪም ራቃ ይንግደር የዎዳዳ ካሺ።
7. ኮዶንካም ቃልቴ ክሳ ታማርናቤ ጲፕሮስቤ ናንቴ ዩም ብራንቴ ገሊላዛራ ያአና ክያአይ፤ የናንቴ ይጌያዳግያ ኦጎታር ኪም ፓና የያፓይ ሃማንቴ ኬናንቴ ጌይማቴ።
8. ሜናኻም ቃስማንቴ ግባዛዳቴ ዱክን እሮኻ ጎብቴ ውትድና፤ ኩርቲንዳንቴ ይዶንታካ ኤዲ ናንቴ የር ካላኻም ጌያድማም።
9. ሳምንታሳ ሮራ ካርሳጋላ ቡርን ዴንዴን ባራ ይዳደዶንሳ ራስባራ፤ ኤስን ይንዛራን ቤሮ ሶዳን ይቡልዶን መግዳላዊት ፔን ጋን ማርያም ናንቴ ብራንቴ ሃፕንዲድና።
10. ና ቃልቴ ኤና አና ክላማን ዳና ቃብምቴ ኬኤፕካ ሃፓንቴ ኖ ሳዳንካ ክዶንቤ ኪም ይያፓዶቤም ኬናንቴ ጌይዲና።
11. ኮዶን ኬ ኮም አምናድማም።
12. አጋሳ ራስባራ ይሳ ታማርናሳ ላማ ናንቴ ጋጣርንዛራ ኬይካ ኤዲ አብግያ ማታንቴ ኬላማ ኬርዲና።
13. ኬ ማታቴ ናዴ እግናም ታማርና ክሳ ዋን ናንቴ ጌይድና፤ ይያማን ታማርና ዋን ኬም አምናድማም።
14. ሃያንቴ ታማርና ክሳ ታዲ ካላና ናንቴ ፑጫንቴ እስምቴ ኬዳኳ ሃፕንዲድና፤ ዴንዲንባራ ክዳደዶሳ ራስባራ ኤና ኪም ሃፓዳናሳ የራ ጌይዳዳናም ኬአምድምንታኻ፤ ኬአምድማኻቤ ኬሳ ዎይላምሳ ዛርምንኻ ኬዛራ ዋጭምዲና።
15. ይንታካምና ክግያ ክያማዶ፤ ፔን ጋላፒን ሁልዛራ ይማቴ ወንጌልም ኤና ውል ናንቴ ታማርስማቴ፤
16. ኤያ አምናዳ ኑንቆንካ ሻይዳዳ ዳቃና ክዳቃይ ኮዶን ኤያ አምናድማዛራ ብቶን ታካና ታካዳይ።
17. ኤና አምናዳናም የራ ክና ኬም ጫጋና ኬጫጋይ፤ እሳ ናብንካ ቤሮናም ቡላና ኬቡላይ አፖ ሃልካም ዴላቃና ኬዴላቃይ፤
18. ጉኖንካም አንካ ይዳና ኬዩዳይ፤ የር ኤዲም ዴሳያ ኬውጭና ኬዛራ የር ዛርቦ የስክስማም፤ አንን ይሳም ኤና ሃጂምናዛራ ኬዎዲና ኬ ፓሻና ኬፓሻይ።
19. ጌዳ የሱስ ክናም ኬናንቴ ጌያንቴ አጋዛራ ፖላንዛራ ዳዲድና፤ ባሪያሳ ምዛቅባራ ዳርቅድና።

20. ሃያንቴ ታማርና ናዴ ራቅ ሁል ግድር ታማርስድና፤ ጌዳካሞ ኬንካ አሽክቴና ክዶ፤ ኬሳ ታማርንካ ሃማንቴ የራ ሃምቴን ዳናካ ጌዳሳ አፖኖ ኤና ዛራ አሽክቴና ኮዶ።